

tidak layak'

Oleh JAAFAR MULUP

JOHOL, Isnin — Datuk Johan Pahlawan Lela Perkasa Setia-
wan Haji Abdul Rahman Mohd Som menolak dakwaan keluarga Puan Ramlah Abdul Samad, 49, kononnya mereka berhak menyandang pesaka Undang Luak Johol dan menyifatkan tuntutan itu sebagai perbuatan memutarbelitkan aturan Adat Papatih.

Keluarga Puan Ramlah adalah daripada Suku Biduanda Raja Balang, dan hanya berhak menyandang pesaka Datuk Lembaga Tiang Balai dengan gelaran Datuk Raja Balang.

Sejak zaman dulu lagi, waris perempuan Suku Biduanda Raja Balang tidak pernah mendapat sebarang imbuhan "lemak tanah" daripada kerajaan.

Bagaimana pula mereka mendakwa berhak menyandang pesaka Undang Luak Johol, kata

Datuk Haji Abdul Rahman.

"Mereka yang layak menyandang pesaka Undang Luak Johol adalah daripada kalangan anak-anak Waris Perut Johol dan Perut Gemenchih.

"Penyandang pesaka itu digilirkan, jika jawatan Undang oleh Perut Gemenchih maka jawatan Datuk Baginda Tan Mas (Bakal Undang) disandang oleh Perut Johol seperti sekarang ini," jelasnya.

Mengenai peristiwa keluarga kembar, Lokman dan Hakim mengamuk di upacara istiadat kerjan bagi menyempurnakan istiadat bersiram di Perigi Gadang dan menaikkan daulat di Makam Gubah, Sabtu lalu, Datuk Undang berkata:

"Peristiwa itu mungkin dirancang kerana ia adalah peristiwa kedua dilakukan oleh keluarga itu".

Peristiwa pertama dilakukan oleh keluarga Puan Ramlah ketika

rombongan Datuk Undang hendak mengadap Yang Dipertuan Besar di Istana Seri Menanti, tahun lalu.

"Walaupun pagi semalam Puan Ramlah meminta maaf, kami tidak dapat menerimanya, tambahan pula perkara ini diserahkan kepada polis. Biarlah polis menyelesaikannya," kata beliau.

Sementara itu, Yang Dipertuan Besar Negeri Sembilan dan Tunku Ampuan mengetuai senarai orang kenamaan yang menghadiri jamuan agung, acara kemuncak istiadat kerjan (tabai) Undang Luak Johol ke-12, Datuk Johan Pahlawan Lela Perkasa Setia-
wan Haji Abdul Rahman Mohd Som di Balai Undang di sini hari ini.

Turut hadir ialah Undang Luak Jelebu, Tunku Besar Tampin, Menteri Besar, Datuk Mohd Isa Haji Abdul Samad dan isteri masing-masing.